

# Carta huántu tzokli Santiago

*XATAPAJMUJUN TACHIHUIN:*

Caj xpápacatá pi yumá carta lichihuinamá xatú ya tatlahu xlítlahuacán huánti lipáhuankoy Dios, lhúhuá huánti puhuankoy pi Santiago caj xman lacasquín camásiyukolh xtatlahucan chixcuhuín. Xlicaná xlá pi Santiago lacatancs huan pi huánti lipáhuán Dios mákat tuncán xlitasíyut tlán xtatlahu, sámpí chuná namá huan pi “yamá huánti huan pi lipáhuán Dios, chü ni pala tzinú limásiyuy huántu lacuan tatlahu c-xlatámat, xlipacs yumá tú huan pi canajlay, caj lámpala ni xtalulóktat quitaxtuy, usu min litaxtuy pala ni canajlay” (2:20). Santiago xman huá litákatzankay pi xlipacs huánti lipáhuankoy Dios xlipacs chalí chalí xlatamatcán catlahuakolh huántu lacuan tatlahu, chü ni caj xman caliaklhuhuátnankolh pala tancs, usu ni tancs huántu litákálchihuinankocá xtachihuín Dios, usu pala aktum tastacyáhu ni matláníl; huata xatlán camásiyukolh c-xlatamatcán pi xlicaná canajlanikoy Dios.

Xlá lacatancs quincáhuaniyán pi cuíntaj catlahuahu, chü nitú tilimáxcajuálinanáhu quisimakatcán (3:1-12), ná ni pala tí caquiclhcatzanihu, nitú calakcatzahu, chü ni calakatílacáhu nakalhíyáhu xman huá huántu anán cátuxáhuat (3:13; 4:10). Nití caliyáhuahu pala tú quintächixcucán (4:11-12). Xáhuachí acxní pala tú tlahuaputunáhu, ni huá litlancanáhu,

chu maktum tuncán namálulokáhu pi chuná natłahuayáhu, sə̄mpi “xmə̄n huá Dios catziy huántu quinçaqspulanítán nahuán lichalí quilhtamacú xkakamächá” (4:13-16).

Xlikatsputni yumá carta huanikocán xlipacs huánti lipáhuankoy Cristo pi ni tlakaj caankolh, huata lipaxuhu casquinikolh Dios c-xoracioncán laquimpi huántu tlə̄n calatamäkolh, chu nītú caakspulakolh xlipacs chixcuahuín (5:7-20).

### *Santiago xakatlilacán huánti tzoknimakó xcarta*

<sup>1</sup> Quit Santiago, cscujni Dios, chu xlá Quimpuchinacan Jesucristo, luhua caña lipaxuhu ccaxakatlilacämächán xlipacs huixín judíos huánti lipahuanátit Jesús, huánti canihua lapulayátit cə̄tuxáhuat.

### *Dios mastay tastácat, chu tapaxuhuanalén xlakskatán huánti mapatinimaca*

<sup>2</sup> Quinatalanín, acxni huixín catuhuá calítoklhcanátit, chu luhua tuhua talakapútzit nakalhiyátit, nī pala tzinú cə̄mininiyán nalísitziyátit, huata caj calipaxuhuátit.

<sup>3</sup> Sə̄mpi acxni c-milatamätcán caliucxilhcanátit caxatucahuá talakapútzit, pus acxni chuná cə̄akspulayán, juerza catlahuanítit napaxuhuanapatiyátit, sə̄mpi lapi nī natatlajiyátit huixín chuná nalitalulokátit pi xlícaña tlə̄n macalayátit mə̄squi cacälakchín catuhuá atipatú tasokalín. <sup>4</sup> Huampi luhua cuíntaj catlahuátit pi tamá mintapaxuhuanaléncán nī calaclatáyalh huata lihuaná cacämäakstítumilín,

chu cacamaktayán lantla xlicaná nacatlanátit c-mintacanajlacán, chu niálh ucxni tú caticaquitzankanincú c-mintahuixcanincán.

<sup>5</sup> Lapi huí chatum huixín pala ni kalhiy tancs talacapastacni, huata xman huá Dios casquínih laquimpi namaxquiy, sampi xlicaná pi namaxquiy, chu xlá ni caj xatalhcán maxquiy caticahuá, xahuá cacatzítit pi nitú quincalihuaniyán acxni tu squiniyahu.

<sup>6</sup> Acxni quin squiniyahu xtalacapastacni, quincaminiñiyán xlipacs quinacucán nalipahuanahu pi naquincamaxquiyán. Huá chuná ccalihuaniyán sampi yamá huantí atuyá puhuán ni luhua lihuaná taluloka pala namaklhtinán huantu squinima Dios, tama chixcú ti macpuhuán luhua xtachuná litaxtuy la xakan takayahuaná huantu quimakosuma un, lacmín lacán len. <sup>7</sup> Huantí chuná lilay xtacanajla, ¿lántla luhua nakalhkhalhitahuilay pi Quimpuchinacán namaxquiy huantu squinima?

<sup>8</sup> Sampi tama chixcú ni akstítum huilinit xtalacapastacni, luhua lipecua atuyá puhuán; huá chiyú tanu huantu lacapastaca, chu chalí tanujá huantu natlahuay, ni akstítum canajlay huantu tlahuaputún.

<sup>9</sup> Huixín huantí luhua limaxkanín, huampi cumu lipahuanátit Dios pus luhua milipaxuhuatcán sampi xlá luhua talipahu calimaxtunitán Dios c-xlacatín. <sup>10</sup> Na chuna litum huixín huantí masqui matamacunanín, chu pacs kalhiyátit tu maclacasquinátit, huampi cumu na lipahuanátit Dios, huixín na camininiyán napaxuhuayátit xpalacata cumu catziyátit pi Dios

nítú l̄jucxilhma mintumincán huata c-xlacatín litaxtuyátit xt̄achuná l̄antla cat̄ihuā chixcuahuín. Chuná cuan s̄ampi huixín m̄atamacunánín luhua xt̄achuná litaxtuyátit l̄antla xaxanat p̄ukalhtum tachanán huantú n̄i makapalay. <sup>11</sup> S̄ampi acxní pulhachá chichiní tzucuy tatalhmaniy, ch̄u lip̄ecuā c̄achichijuán, yamá tachanán tzucuy xnaka, alistálh sc̄aca, ch̄u yujtamakán xaxánat, antiyá lakspukoy l̄antla l̄ilakátit xuanit. Na chuná naquitaxtunikoy m̄atamacunánín c-xlatamatcán, masqui lh̄uhuá t̄u kalhikoy, namín quilhtamacú acxní nanikoy, namakaxtakkoy cat̄ihuā t̄u lactlanca xp̄utlajacan tumín huantú tl̄an xlitasiyukoy.

*Canā lip̄axuhu yamá huanti natayaniy, ch̄u napaxuhuānālén l̄antla caxatucahuā tapatín*

<sup>12</sup> Ch̄apaxuhuānā lama yamá chixcú tí paxuhuānālén, ch̄u tayaniy caxatucahuā tatoklhni, usu tatzaksán t̄u miniy, s̄ampi acxní natitaxtukoy xtapatín xlicaná pi namaklhtinán yamá lip̄axuhu ch̄u xlip̄aan latám̄at c-akapún huantú niucxnicú laksputa, huantú xt̄achuná la aktum corona nataquicán, huantú Dios timaláchnuh namaxquikoy xlipacs yama huantí xlicaná paxquikoy, ch̄u lip̄ahuankoy.

<sup>13</sup> Acxní pala tí makcatziy c-xlatám̄at pi toklhmacea laquimpi natluhuay huantú nitlán, niucxní capuhuā pi huā Dios tlakahuacamá pi chuná catláhualh, sampi Dios niucxnicú makcatziy pala tú xtláhualh huantú nitlán, ch̄u n̄i pala ch̄atum tí m̄akpuhuantiniy laquimpi catláhualh, usu pala natzaksaniy

xtacanajla. <sup>14</sup> Huampi cacatzítit pi acxní chuná makcatziyáhu, huá quincasokalíyán xalixcajnit quintalacapastacnicán huantú xlíankalhín quincalactlahuayahuaputunán. <sup>15</sup> Caj xpàlacata xalixcajnit talacapastacni litzucuy talakalhín c-quilatamatcán, chü acxní talakalhín aya lipécua lantla aclhuhuantahuilanit, pus quincamqaktzankayahuayán calinín.

<sup>16</sup> Koxutanín huixín quinatalanín, niucxnicú catákskahuitapátit, <sup>17</sup> sàmpi xlipacs huantú tlán, chü akstítum makamaklhtinanitahu, xlícaná pi c-akapún macamimachá Quintlaçican Dios huantí xmàlacatzuquinacán xlipacs huantú ucxilháhu stacu, chü pacs tū chü makaxkànankoy c-akapún, xlá, xtachuná yama maxkakananín xala c-akapún niucxní natalakpalíy lantla tlán catziy, chü ni quincamakaxtakán c-xalakacapucsua latámá. <sup>18</sup> Cumu xlá chuná lacásquilh, caj xpàlacata xtalulóktat yama lipaxuhu xtamacatzinín huantú mästäy akaputáxtut, xlá quincamaxquín tanú xasästi quilatamatcán laquimpi quin nalitaxtuyáhu xapulana huantí tlak talipáhu xlakskatán huantí namaxquikoy yama xasästi latámátl huantú xlá ná namaxquikoy xlipacs huantí xlakskatán nalitaxtukoy alistah.

*Lantla quilimakantaxtjtcán xtachihuín Dios c-quilatamatcán*

<sup>19</sup> Natalanín tì ccàlakalhamanán, quit clacasquín chàtunú lacatzucu catzaksátit tancs caakatákstit huantú lichihuiñancán, huampi ni calacapalatnántit nakalhtinanatit, chü ná chuná xpàlacata pala nasitziyátit. <sup>20</sup> Sàmpi yama huantí

lhuhua huāntu laksitziy, xlīcanā ni tlahuay c-xlatámat huāntu Dios lakatiy.<sup>21</sup> Huachá xpālacata ccāsquiniyán lītlán pi maksum tu calakmakántit xlipacs huāntu nītlán, chū līxcajnit talākalkalhín huāntu chunacú xalismanín tlahuayátit, chū huata catactujútit c-xlacatín, chū camāxquítit talacasquín pi calakpálilh milatamatcán yamā xasāsti xtamācatzinjin Dios huāntu aya cachanicanítantit c-minacucán; sampi xlīcanā pi huā tamā xasāsti xtamācatzinjin Dios kalhiy tlanca lītlihuakā laquimpi namākaputaxtiy milistacnacán.

<sup>22</sup> Huāmpi ni talacasquín caj xman nakaxmatāhu xtachihuín Dios, huāmpi tlak xlacasquinca pi nalitzaksayāhu c-quilatamatcán, sampi pala huatiyá pi xkaxpáttit, chū ni xlitzaksátit namākantaxtiyátit huāntu huan, huata miacstucán xtākskahuitapáttit pala xpuhuanátit pi chuná mākantaxtipáttit māsqui ni litzaksapáttit. <sup>23</sup> Xlipacs huānti kaxmata xtachihuín Dios huāmpi ni juerzā tlahuaniy pi akstítum nalilatamay huāntu antá līmapaksinán, tamā chixcú luhua xtāchuná quítaxtuniy lāntlā yamā huānti līhuana lacaucxilhcán lāntlā luhua tasiyuy c-aktum espejo; <sup>24</sup> xlā māsqui c-espejo līhuana catziy lāntlā luhua talacasiyuy, huāmpi acxni tapānuniy espejo tuncán patzankakoy lāntlā luhua talacasiyuy. <sup>25</sup> Huāmpi capaxúhualh yamā huānti ni patzankay huāntu kaxmata xtachihuín, usu xlīmapaksin Dios, huāmpi tzucuy litzaksay c-xlatámat huāntu antá līmapaksinán, sampi xlīcanā pi huā tamā līmapaksin huāntu quincamāxquiyán laktáxtut,

chu huánti namákantaxtiy c-xlatámat huántu limápaksinán, xlípac s huántu natlahuay luhua lípaxuhu naquitaxtuniy. <sup>26</sup> Lapi huí tí huixín puhuán pi akstítum cäcninaniy Dios, huampí ni akstítum maclacasquín csimákát, huata catuhuá huántu lixcajuachihuinán, pus tama chixcú xacstu tákkskahuitamáma, chu yama xtacacnín huántu huan pi luhua tlán, xlícaná pi nitú xlakasi ni maktayama c-xlatámat. <sup>27</sup> Sampi yamá huánti xlícaná kalhíkoy xaakstítum tacacnín huántu lakatiy Dios nakalhiyáhu quin huánti lipahuanáhu, huá kalhíkoy xlacán huánti ankalhín maktayamakó huánti laklimaxkanín, xáhuá puhuaninanín lacchaján huánti pala tú lipatímakó, usu pala tú akspulamakó, chu huánti laktzaksamakó nitú nalíxcujuálakoy huántu lixcájnit anán uyenú cätxáhuat.

## 2

*Ni huá calilacankuhu pala tí limaxkan, chu ti matamacunú, acx tum calimaxtukohu*

<sup>1</sup> Natálanín, xlípac s huixín huánti lipahuanátit yamá talipáhu Quimpuchinacan Jesucristo huánti tlanca xlacatzúc, ccáhuaniyán pi niucxni caj nalacsacpaxquiinanátit pala makapitzín tlak napaxquikoyátit, chu xamakapitzín caj nalakmakankoyátit. <sup>2</sup> Caj lantla nalíchihuinánu, lapi xamaktum acxní huixín macxtum huilátit nahuán laquímpí nalakataquilhpütananátit, chu antá nacalakchanán chatum chixcú huánti tlanca matamacunú, chu lapi xlá makenuy xatapalaxla xaníyu xlá oro, chu litacaxtayanit xalacuán,

chu lactapalaxla lhákət, acxní naucxilhátit pi luhua talípəhu, tlən tū naliłakaputzayátit, hasta chuná nahuaniyátit: “Calacapala, unú catahuila, huí aktum tlən pütáhuılh.”<sup>3</sup> Chu lapi nā acxnitiyá nacalaktanuyachán chātum liłakalhamanat liłmaxkan huánti liłhakananit pacs xalakuán, chu xatalatzapatamən lhákət, huata xlá chuná nahuaniyátit: “Yanú c-tankanu huix catayapi, usuchí tanú culucs catahuila caj chunata catiyatnā lacatzú c-quintuhuán.”<sup>4</sup> Lapi huixín chuná xtlahuátit, xlicana pi aya lacsacpaxquinampátit, xahuá caj xmən huá ucxilhlaçachipimpátit tumín, chu ni huá mintälacán luhua paxquipátit.<sup>5</sup> Koxutanín huixín natalanín, cakaxpáttit huántu naccáhuaniyán: ¿Lántla pi ni catziyátit pi Dios lacsackonit huánti liłmaxkanín, huánti nítú kalhikoy huántu xtapolh tumín unú catuxáhuat, laquimpi xlacán atzinú akstítum nalipəhuankoy, chu luhua matamacunánin nalitaxtukoy c-xtacanajlacán, laquimpi xalihuacá xlacán ti mininikoy namaklhınankoy yama lipaxuhu latámət c-xtapáksit huántu məlacnunikonit namaxquikoy xlipacs huánti paxquikoy, chu lipəhuankoy?<sup>6</sup> Huampi huixín huánti huanátit pi lipahuanátit Dios ni cajcu maktum lakmakanátit huánti liłmaxkanín. Lihuaná calacapastáctit, ¿pá ni huá tamá matamacunánin huánti cäakskahuimaklhiyán huántu huixín kalhiyátit, chu camaxuataleninanán c-xlacatincan mapaksinanín laquimpi namaxokonikoyán hasta masqui huántu niähl lakahuilanítit?<sup>7</sup> ¿Tú akatäksátit pi xlacán luhua calahuá, chu lixcájnit

likalhchihuínankoy xtucuhuini Cristo huánti huixín makamaklhtinántit, chü chiyú lipáhuántit?

<sup>8</sup> Lapi huixín xlícaña mákantaxtiyátit yamá xlímapaksín Dios huántu tlak luhua quilimákantaxtítcán huántu chuná tatzok-tahuilanít c-Likalhtahuaka: “Calakalhámanti xlípac̄s mintachíxcú xtachuná lantlata huix mi-acstu lakalhamancana.” Lapi chuná tlahuapátit, pus luhua tlān huántu mákantaxtipátit. <sup>9</sup> Chi huā pala pi caj lacsacpaxquianátit, pala huí ti atzinú lakalhamankoyátit, amakapitzín lakiakankoyátit, pus macapatanuyátit tlanca talakalhín, na huā xlímapaksín Dios camakstuntlahuayán pi lactucxyahuanitántit. <sup>10</sup> Sampi lapi chatum litzaksama lihuana namákantaxtiy xlípac̄s huántu huí xlímapaksín Dios, huampi lapi ni namákantaxtiy pūlactum huántu huan yamá limápaksín pi xlitláhuat, pus quitaxtuy xtachuná pala xlipulactuminicā lactucxyahuakoy huántu huí xlímapaksín Dios, chü mininiy nalipatinán. <sup>11</sup> Sampi Dios huánti limápaksínalh: “Nití tixakatlīya tānuj puscat lapi huí mimpuscat”, pus huatiyá tama quiDioscán huánti limápaksinampá: “Nitú timakniyā mintachíxcú.” Pus lapi chatum nití xakatliy tānuj puscat sampi kalhiy xpuscat, huampi lapi namakniy xtachíxcú, juerza xlipatínat sampi kalhakaxmatmakanít huántu huan xlímapaksín Dios. <sup>12</sup> Huampi huántu mimpalacatacán, akstítum cakalhchihuínantit, chü akstítum calatapátit xtachuná lantla ti lihuana catziy pi ni caj juerza matlahuiyacā, huampi huata caj luhua xtapaxuhuán mákantaxtiputún

yama xasasti xlimapaksin Cristo huantu quincaliminiyán laktáxtut laquimpí quin caj quintapaxuhuancán tlan nalimakapaxuhuayahu. **13** Sampí acxní nalakchán yama quilhtamacú acxní xlipacs chixcuhuín namakalhapolikocán, chu namapatiñikocán c-xlacatin Dios, yama huanti ni tzinú lakalhamankonít amakapitzín c-xlatamatcán, na ni pala tzinú catilakalhamankoca; huampí huanti lanchuj quilhtamacú lakalhamankoy amakapitzín, acxní chu Dios namaxokonikoy xlipacs tachixcuhuítat, xlacán luhua lipaxuhu naquitaxtunikoy sampí na nalakalhamankocán, chu natayanikoy.

*Pala tí xlícana lipahuán Dios calimasíyulh xlatámat*

**14** Natalanín, ¿tú natlajaniy lapi huí tí nahuán pi xlícana lipahuán Dios huampí ni pala tzinú limasiyuma xlatámat? ¿Pá huixín puhanátit pi tlan namakaputaxtiy caj xtacanajla huantu kalhiy? **15** Caj calacapastáctit: lapi huí chatum lantla huixín pala chixcú, usu puscat huanti tzankaniy huantu maclacasquima, **16** chu caj chuná namá nahuanicán: “Lacatzucu napina, Dios capulanín. Huantu tlan calhakánanti, chu tlan cahuayampí hasta nakalhkasa”, huampí lapi ni maxquimaca huantu namaclacasquín c-xtiyatlihua, xahuá huantu nalihuayán, ¿pá huachá nalikalhkasa caj man lacuan tachihuín huantu huanica? **17** Pus na xtachuná quitaxtuy quintacanajlacán, lapi caj xmán huanahu pi lipahuanahu Cristo, chu ni pala tzinú limasiyuyahu quilitamatcán, quitaxtuy xtachuná

lampala ni lipahuanahu. <sup>18</sup> Xamaktum pala huí ti ni matlaniy tu cuanit, chü chuná naquihuaniy: “Huí makapitzín huantí akstítum lipahuankoy Cristo masqui nítu tlahuamakó huantú lacuan tatlahu.” Huampi quit chuná nackalhtiy: “Cpuhuán pi huix ni lay naquimalulokniya tu huaná xpälacata yama tì tlán akstítum nalipahuán Jesús acxni c-xlatámät ni tlahuama huantú lacuan tatlahu, huampi quit tlán nacmásiyuniyán lantla caj xpälacata lacuan tatlahu tu ctlahuama tlán nacmalulokniyán pi clipahuán Jesús.” <sup>19</sup> Lapi huix cañajlaya pi xman chatum tlanca talipahu Dios huí c-akapún, luhua xlícaná pi tlán lantla cañajlaya; huampi milicátzit pi hasta akskuhiinín na cañajlakoy xman chatum Dios anán, chü acxní lacapastackoy pi chuná, caj lantla xtapecuacán tzucuy lhpipixníkoy. <sup>20</sup> Huá xpälacata clíhuaniyán, ni xatzácat cacatzi, huata caakátaksti, chü calicatzitahuila pi lapi lipahuaná Dios huampi ni litzaksápät c-milatámät yama xatatlahu huantú xlá lakați, pus mintacanajla caj lampala ni xtalulóktat quítaxtuy. <sup>21</sup> Masqui acxní makasa quilhtamacú Dios matzankanánilh Abraham, chü limáxtulh xtachuná pala nialh tú xlaclén c-xlacatín caj xpälacata pi lakátilh lantla lakachixcuuhilh pi calelh xkahuasa huantí xuanicán Isaac c-aktum kastín, chü antá camáknih c-xokspun altar, chü chuná calisahuánih Dios la tantum xalimaknit licaxtlahuán. <sup>22</sup> Lantla Abraham xlipahuán Dios, luhua xlimálulokma xtatlahu, chü caj xpälacata pi akstítum tu xtlahuama c-xlatámät yama xtacanajla tancs mäakstítumililh.

**23** Chu c-xlatámat lihuana likantáxtulh huántu tatzoktahuilanít c-Likalhtahuaká antaní chúná huan: “Abraham akstítum lipáhuá Dios, huá xpápacata Dios matzankanánilh, chu limáxtulh xtachuná pala nítú xkalhiy xtalakalhín. Chu huá xpápacata acxní Dios lichihuinán Abraham hasta na limáxtuy la xamigo huánti luhua xpaxquiy.”

**24** Antá luhua cuíntaj catlahuátit pi Dios xalaktaxtún limáxtulh xtachuná pala nialh tú laclén c-xlacatín, ni caj xman cumu limakapaxúhualh Dios lantla akstítum xlipáhuán huampi na xpápacata pi limálulokli lacuan xtalahu huántu xmasiyuy c-xlatámat. **25** Na chuna litum quitaxtúnih yama xaaktzankatayani puscat xuanicán Rahab, Dios matzankanánilh, chu limáxtulh xtachuná lampala nialh tú xlaclén c-xlacatín caj xpápacata pi xlá cámátzekli c-xchic, chu masiyunikoh tánuj tiji laquimpi natzalakoy yama talakachanín judíos huánti xankonít ucxilhuilinankoy c-xcachiquín. **26** Laquimpi lihuana naakataksátit huántu ccahuanimán, lapi xtiyatlihua chatum chixcú ni kalhiy xlistacna, quitaxtuy pi xanín, chu huánti huan pi lipáhuán Cristo, huampi lapi nítú limasiyumá c-xlatamat tlán tatlahu, quitaxtuy pi xanín xtacanajla.

### 3

#### *Luhua cuíntaj quilitlahuaticán quisimakatcán*

**1** Natalanín, ni luhua chalhuhuá nalitaxtuputunátit la lactalipáhu makalhtahuakananín, sampi huixín lacatancs catziyátit pi quin huánti masiyuyáhu xtachihuín Dios cuíntaj quilitlahuaticán

huāntu māsiyuyāhu, sampi quin ətzinú luhua  
 lipēcuā naquincāmāpaṭinicanán c-xlacatín  
 Dios ní xahua əmakapitzín lapi ní xtalulóktat  
 huāntu nahuanāhu. <sup>2</sup> Xlipacs quin lhūhuā  
 huāntu liakchakxtayayāhu, chū tlahuayāhu  
 huāntu nītlán, huāmpi lapi chatum niucxnicú  
 quilhpātanuy, niucxní huan huāntu ní xlihuánat,  
 xlīcanā pi tamā chixcú makaacchán kalhiy  
 xtalacapastacni, chū catziy cuíntaj tlahuay  
 xlipacs xlatámāt. <sup>3</sup> Huixín catziyátit pi acxní  
 tantum cahuayú mākalhnuyāhu xfreno, tu  
 tlān limālakspitāhu, chū lenāhu canihuá  
 antāni quin puhanāhu. <sup>4</sup> Nā caucxílhit  
 yamā tlanca putacutnu xala c-tákayāhuaná,  
 māsqui luhua lactlanca, chū māsqui tlihuaka  
 un tahuacaniyāchí huāntu snoklén, caj actzú  
 timón kalhiy huāntu xlimatlāhuanicán huá tlān  
 līlenkoy xmātlāhuaninánin canihuā antāni  
 xlacán lemputunkoy. <sup>5</sup> Nā luhua xtachuná  
 quitaxtuy quisimakātcán, māsqui xlīcanā pi lāntlā  
 quilichatuminacacán, huá ətzinú nītú xlakasi  
 sampi luhua actzú, huāmpi huata tlak lhūhuā  
 huāntu xlá tlān tlahuay. ¡xtachuná quitaxtuy lā  
 actzú lhcuyāt huāntu tlān puxkoyuhuiliy aktum  
 tlanca cāquihiún! <sup>6</sup> Chu tama simákāt kalhiy  
 tlanca xlītlihuakā xtachuná lā lam pasay tlanca  
 lhcuyāt. Quisimakātcán huāntu kalhiyahu c-  
 quinquilhnicán quincāmāhuaniyán hasta māsqui  
 huāntu lixcájnit; māsqui caj pūlactum, chū ní  
 xlīcanā huāntu quincāmāhuaniyán, huāmpi  
 quilichatuminacacán quincāmaxcajualiyán.  
 Yumā quisimakātcán huá mān limāpasikonít

clhcuyat akskahuiní laquimpi na xlipacs quilatamatcán namaxcajualiyahu mäsqui huantu ni lixcajnit xuanit laquimpi nalaktzankayahu.

<sup>7</sup> Chixcuhuín tlän mämantzujlikoy tuhuajcuta takalhín, xtachuná lantla tu koskoy caunín, xahuá lhuhua huantu taxuataankoy catiyatna, na chuná huantu lamakó c-pupunú, chuná namá mämoustzulenkonit; <sup>8</sup> huampi tamá simákat ni pala chatum ti tlän xmämustzúhuilh, xlá ni tamastay namakatlajacán ni nahuán yama lhuhua lixcajnit, lilaknín kalhiy huantu malaktzankayahuanán. <sup>9</sup> Xlicana pi huá quisimakatcán limaxquiyahu cacni Quintlatican Dios acxni tliniyahu, chü c-quioracioncán; na huá litum quisimakatcán lihuanaahu pi calaclenkolh yama huanti sitzinikoyahu mäsqui xlicana pi huá Dios na malacatzuquikonit, huá tlahuakonit laquimpi nakalhikoy huantu lacuan talacapastacni xtachuná lantla xlá kalhiy.

<sup>10</sup> Lacatuma quinquilhnicán antaní taxtuyachí yama lacuan tachihuín huantu limaxquiyahu paxcatcatzinit Dios, xahuá yama laclixcajnit tachihuín huantu calahuá liaktlakaxakatlikoyahu huanti sitzinikoyahu. Natalanín, quit tancs ccáhuaniyán pi ni chuná xlílat. <sup>11</sup> Caj luhua lihuana calacapastáctit: c-akatum taxtunú, ¿pá tlän taxtuyachí xasaksi chúchut, chü na antiya litum nataxtuyachi xaxun chúchut? <sup>12</sup> Sampi chuná la akatum cucata ni lay láxux nahuán xtahuácat, na ni pala akatum asíhuít xtahuácat nahuán uvas, huá xpalacata ccalihuaniyán pi aktum taxtunú antaní taxtuyachi xasquiya

chúchut, *ní* lay *pi* antiya *litum* nataxtuyachi  
xaskoko chúchut.

*Pala tí makcatziy pi luhua akskálalh,  
calimásiyulh xlatámät*

<sup>13</sup> Lapi c-milakstipancán lama chatum huantí makcatzicán pi luhua akskálalh, pus tancs calimásiyulh xlatámät huantu tlán tlahuay laquimpi xlipacs amakapitzín naucxilhkoy pi xlícaná akskálalh, huampi lapi *ní* nalitlancacatziy xtatlahu tlak xalihuacá nalitasiyyuy xliakskálalh. <sup>14</sup> Chi huá palapi mästayátit quilhtamacý pi nacamakatlajayán c-minacucán taquiclhcatza, xahuá tasitzín, xahuá nitú laliucxilhátit, chu acxni pala tú nitlán tatlahu tlahuayátit, huá chuná lítlahuayátit sámpí caj huí tí tälamakatlajaputunátit, huampi tancs ccáhuaniyán pi *ní* pala tzinú cämininiyán tlancaj nacalimakcatzicanátit sámpí *ní* chuná akstítum limakantaxtipátit lantla lacasquín Dios natlahuayátit xtatlahu, xahuá *ní* lilatapayátit huantu xtalulóktat. <sup>15</sup> Chu lapi huí tí tlancaj limakcatzicán xliskalala acxni tlahuama aktum nitlán tatlahu, *ní* xlícaná huá máxquinít xliskalala Dios tí huí c-akapún, huampi unú catuxáhuat catzininit tamá talacapastacni, huá xliskalalacan chixcuhuín, chu hasta ná maktanunít akskahuiní. <sup>16</sup> Sámpí antani pac*s* laquiclhcatzanikoy, lataskahuinikoy, chu lámakasitzikoy, pus ná antá tasiyyuy huantu lixcajnit täkslokón, xahuá catuhuá *ní* tlán tatlahu. <sup>17</sup> Huampi xlipacs huantí xlícaná kalhikoy xtalacapastacni, xahuá yama tastácat huantu Dios mästay, *ní* chuná

latamäkoy, huata xlacán luhua akstítum lemäkó xlatamatcán, kalhikoy tlän tapuhuán, tlän catzikoy, catihuá pacs lakalhamankoy, acxní pala tú huanikocán, usu pala mapaksikocán xlacán lipaxuhu kalhakaxmatnínankoy, pala tú nítlan tlahuanihocán paxuhuñalenkoy; acxní kalhchihuiñankoy huankoy xtalulóktat, chü xaliankalhín tlahuakoy huantü lacuan tatlahu.

**18** Xlipacs huantí lilakaputzamäkó pi lipaxuhu, chü aktziyaj calatamatkolh amakapitzín, luhua xtachuná quitaxtunikoy lampala chamäkó huantü tlän latamat, chü acxní nalakchán quílhtamacú lantla namakalakoy huantü chankonit c-xlatamatcán amakapitzín, xlicaná pi natasiyyu huantü lipaxuhu, chü akstítum latamat huantü nakalhikoy.

## 4

### *Quililakachixcuahuítcán Dios ankalhín*

**1** Luhua lihuana calacapastáctit, lantla c-milakstipancán, qní luhua minchá takslokón, xahuá taquiclhcatza acxní tzucuyátit lamakasitziyátit? Xlicaná pi niní alacatanu huampi antiyá c-milatamatcán sampi antá ankalhín casokalimán xalixcajnit mintalacapastacnicán. **2** Chuná quitaxtuy sampi acxní pala tú huixín lakatiyátit, chü ni lay kalhiyátit, pus lalakcatzalacapiniyátit, latalatlahuayátit, lalacataquiyátit, chü fuerza litlahuaniyátit, chü hasta lalimakniyátit caj xpälacata huantü puhuanátit pi xkalhítit. Xlicaná pi ni lay kalhiyátit huantü puhuanátit sampi ni

huá squiniyátit Dios. <sup>3</sup> Xahuá masqui puhuanátit pi squiniyátit Dios tu cäquitzankaniyán xtachuná pala tumín, niucxni cämaxquiyán, huampi huá xpälacata ni tancs squiniyátit, sampi xlipacs huantü huixín puhuanátit xkalhítit lilacapastacátit lantla nalipaxuhuayátit xala c-mintiyatlihuacán. <sup>4</sup> ¡Koxutanín huixín huantí caj xmán likamáñamputunátit Dios! ¿Lantla pi ni catziyátit pi xlipacs huantü lakañilacapinátit, chü xmán lipaxuhuaputunátit huantü lixcájnit anán cätxuxáhuat, xlicaná quítaxtuy pi ni ucxilhputunátit Dios? Xlipacs huantí aktum catziy pi atzinú mañlaniy, chü lakañiy xlipacs huantü lixcájnit anán cätxuxáhuat, pus na luhua xtalatlahuana Dios quilitaxtuy. <sup>5</sup> Huá xpälacata Dios limatzokninalh c-Likalhtahuaká antañi chuná huan: “Yamá Espíritu Santo huantü Dios huiljinít c-quílatamátcán laquimpi akstítum nalatamayáhu, xlá quincalakcatzanán, chü lacasquín pi xmán huá natapaksiniyáhu.” <sup>6</sup> Huampi na milicatzitcán pi cumu Dios quincapaxquiyán xaljankalhín quincamaktayamán laquimpi acxni naquincatoklhputunán huantü nitlán tatlahuaputü xala cätxuxáhuat, tlán natayaniyáhu, chü huá litalulokáhu huantü tatzoktahuilanít c-Likalhtahuaká antañi chuná namá huan: “Dios ni pala tzinú mañlaniy xtayatcán huantí tlancá catzikoy, chü luhua talipáhu makcatzikocán, huampi huata luhua lakalhamankoy huantí nitú putzama, huata caj litayay pi nitú xlakasi.” <sup>7</sup> Huá xpälacata ccalihuaniyán, xatlán maktum catamacamastanítit Dios chü

acxní chuná huixín natlahuayátit, xlícaná pi tamá akskahuiní nacatzalamakanán.

<sup>8</sup> Lipaxuhu calaktalacatzuhuítit Dios laquimpi xlá ná lipaxuhu nacamakamaklhtinán, chü nacákaxmatniyán xlipacs huantü nahuaniyátit. ¡Xlipacs huixín huantü xtlahuanítántit talakalhín, maktum camakaxtaktayátit! Ná chuná huixín huantü puhuanátit pi lipahuanátit Dios huampi lakatiyátit lipaxuhuayátit xlipacs huantü lixcájnit anán cätxáhuat, quit ccáhuaniyán pi calakpalítit xtalacapastacni minacucán.

<sup>9</sup> Lihuana calitalakaputzítit huantü nitlán tlahuaniyátit c-milatamatcán, chü tlán calitasátit xlipacs mintalakalhincán; lapi xlitzimpátit pi tlán lapátit, huata chü xatlán catasátit, chü lapi lhuhuá huantü xlipaxuhuapátit, huata chü calipuhuántit. Tamá tapaxuhuán, xáhuá talitzí huantü xkalhiyátit calilakpalítit laquimpi huata nakalhiyátit tlanca talipuhuán.

<sup>10</sup> Cacamakcatzicántit pi nitú milakasicán cxlacatín Quimpuchinacán laquimpi xlá luhua lactalipahu nacalimáxtuyán.

### *Nití catziy antaní naquitayay c-xlatámat*

<sup>11</sup> Natalanín, niucxni calahuá calikalchihuijnántit mintalá, sampi yamá huantü calahuá likalchihuijnán chatum xtalá, usu pala putzananiy xtalakalhín huantü tlahuaniy caj xman laquimpi tlán nalihuaniy, tamá chixcú litaxtuy xtachuná pi lihuaniy xlimapaksín Dios pi nitlán huantü limapaksinán sampi antá huan pi quilaipaxquitcán. Lapi huix lihuaniya Dios pi nitlán xlimapaksín, xlícaná pi nialh

mákantaxtípat huántu límapaksinán huampí huata lítaxtuya xtachuná lantla chatum juez huánti makalhapanán. <sup>12</sup> Huampí milicátzit pi xmán chatum Dios huánti mastanít xlímapaksín, chu xmán huá xacstu lítaxtuy tlanca talipahu juez; xlícaná pi xmán huá tlán naputzanánikoy, usu namapatiñikoy tachixcuhuítat lapi xlá chuná nalacasquín, usuchí namaxquikoy laktáxtut. Huampí huix, étu milakasi laquimpi tlán tají naputzanánikoya, usu naliuhanikoya huántu tlahuamakó amakapitzín chixcuhuín?

<sup>13</sup> Cuíntaj catlahuátit huixín huánti lacatancs malulokátit acxní chuná huanátit: “Pala huá chú, usuchí chalí naanáhu yama c-aktum cachiquín, antá nalatamayachahu cana caj aktum cata, catuhuá naliscujáhu laquimpi natlajayáhu lhuhua tumín.” <sup>14</sup> Huampí ni pala tzinú catziyátit huántu caakspulanítán nahuán c-milatamatcán chalí tuxama naxkakayachá! Sampi milatamatcán xtachuná lítaxtuy la jínat huántu caj puntzú tasiyuy acxní tamacatatahuilay, chu ni pala xalitacatzín lantla lakspupalakoy. <sup>15</sup> Huata acxní nakalhchihuinánátit chuná milihuancán: “Lapi Dios lacasquín nalatamayáhu chalí quilhtamacú, naanáhu yama c-aktum cachiquín, naucxilháhu pala tú antá naliscujacháhu.” <sup>16</sup> Huampí cumu lismaninítátit acxní pala tú likalhchihuinánátit maktum tuncán macanajliyátit pi chuná naquitaxtuy, chu hasta lipacxátit mintatlancacatzincán, sampi luhua lactalipahu camakcatzicanátit mäsqui xlícaná pi nítlan tlancaj namakcatzicanátit. <sup>17</sup> Chuná pi luhua milicatzítcán pi yamá huánti lacatancs

catziy pi xlítláhuat c-xlatámät huántu lacuan tatlahu, chü lapi ni tlahuamä huántu xlítláhuat, pus kalhiy tlanca talakalhín c-xlacatín Dios.

## 5

*Matamacunanín huánti kalhiyoy lhuhua tumín na calílipyuhuankóh*

<sup>1</sup> Huixín matamacunanín huánti huata huá lipáhuanátit lantla lhuhuá kalhiyátit tumín ni xahua Dios, ¡cakaxpáttit huántu naccahuaniyán! ¡Camininiyán catasátit, chü calílipyuhuántit caj xpálaceata yama tlanca talakapútzit huántu nacalakchánán! <sup>2</sup> Sämpi namín quilhtamacú acxní tama mintumíncán huántu huanchú kalhiyátit, xalán lampala xamasni naquitaxtuy, na chuná xalacuan militacaxtaycán aya pasanít nahuán kotxkaluhua. <sup>3</sup> Tama tumín xla oro, chü xla plata huántu huixín mäakstokuilinítántit, aya tzulutuananít nahuán, huá tama xatzulutuanan mintumíncán nacámalaktzankayáhuayán xtachuná la lhéuyat, sämpi huá mintumíncán nacámalacapuyán c-xlacatín Dios yama ahuatiya quilhtamacú acxní natatlahuakoy cuenta xlipacs tachixcuhiytat, chü xatzulutuanán nalitaxtukoy xtachuná la testigo huánti namaluloka pi xlícaná lhuhuá huántu nitlán lítlahuanítántit. <sup>4</sup> Huá yama limaxkanín huánti cátascujnitán c-mimpucuxtucán, huampi huixín ni acchán máskahuikonítántit, huá caliyahuamán huántu tlahuaniikonítántit, chü Quimpuchinacán huánti tlanca xlacatzúcute aya kaxmatkonít xtacatásancán yama koxutanjin scujnín. <sup>5</sup> Lantla lapátit cátuxáhuat huixín paxuhuapátit sämpi

nítú cätzankaniyán, xaacchán huayampátit, hasta huanchú kompátit xtachuná lā takalhín huantú makakonkocán, pero chū aya lakchamá quilhtamacú acxní huixín xtachuná takalhín nacamaknicanátit! <sup>6</sup> Chuná calakchánán sámpí lhuhua laklimaxkanín mapatíníkonítántit, makapitzín hasta maknínítántit, ni pala tzinú tälakaputzakótit mäsqui lacatancs xcatziyátit pi xlacán ni lay cäatalhtaniniyán.

*Santiago huanikoy pi ankalhín catlahuakólh oración, chū capaxuhuanapatíkólh xlipacs huantú akspulakoy*

<sup>7</sup> Natalanín, huantú mimpalacatacán lipaxuhu cakalhkalhitahuilátit nalakchán quilhtamacú acxní namimpalay xlímaktuy Quimpuchinacán. Caucxíltit lā chātum chananá huantí chananán c-xpúcuxtu, cumu lipahuanít pi namakalay huantú chanít, xlá paxuhuaná ucxilhā lantla titaxtuy quilhtamacú lantla kalhkalhitahuilay hasta acxní namin tlancasen, sámpí xlá huí tu ucxilhlacachanít. <sup>8</sup> Pus na chuná huixín huantí lipahuanátit Cristo, ni calaclátit c-mintacanajlacán, huata lipaxuhu cakalhkalhitahuilátit sámpí nialh makás quilhtamacú nachín Quimpuchinacán.

<sup>9</sup> Natalanín, ni taji caliputzanánítit pala tú nitlán tlahuakonít mintachixcucán laquimpi tlán nalihuaniyátit, usu calahuá naliyalhchihuijanánítit. Sámpí huantí chuná tlahuay acstulitamaklhtumiy c-xlacatín Dios huantí xmán huá minjinyi nalitaxtuy lipecuanit juez, chū huantí aya lacanuya c-málaccha

laquimpi chuná natlahuay. <sup>10</sup> Natalanín, huá cakantítit lantla tilatamakolh xalakmakán profetas acxní xpápalacachihuiñananimakó Dios c-xlakstipancan xlítachiquicán, chü lantla xlacán paxuhuñapatikolh niatlán huantu akspulakolh. <sup>11</sup> Quin luhua lactalipahu ccálimaxtuyáhu huanti aya paxuhuakoy mäsqui patikoy caxatucahuá tapatín huantu lakchinkoy c-xlatamalcán, xáhuá aya calitakalhchihuiñancanitántit lantla patinít yama xamakan kolutzín xuanicán Job, ná catziyatittá pi alistálh Dios lakalhámalh pi paxuhuanapátilh xlipacs huantu akspúlalh; huá lilakalhámalh sampi Dios xlícaná luhua tlan xtapuhuán, chü kayaj catzanikoy, xáhuá lakalhamankoy xlipacs huanti lipahuankoy.

<sup>12</sup> Xalihuacá huantu cuíntaj mililtlahuatzcán pi acxní pala tú lichihiñanátit, chü lacasquinátit pi xcānajlaca huantu chihuínántit, ni caliquilhpítit nalimálulokátit akapún, catiyatna, usu pala tú lantla tu anán, huampi huata caj xman cahuántit acxní kalhchihuiñanátit, “Xlicana”, lapi cāna, lapi ni cāna, pus “Ni xlícaná”. Chuná milikalhchihuiñatcán laquimpi niútú nalitamakstuntlahuayátit caj xpápacata mintachihuincán.

<sup>13</sup> Pala tí makcatziy talipuhuán c-xlatámat, mininiy pi catláhuah oración; chü pala tí makcatziy tapaxuhuán c-xlatámat calitlínih Quimpuchinacán tatlin tu nalimáxquiy paxcatcatzinit. <sup>14</sup> Lapi chatum huixín tí tatatlay, catasanikolh lakkolún huanti puxcúnankonit c-siculán laquimpi xlacán napalacasquinkoy c-xoracioncán, chü nalitlahuakoy aceite, ná

acxnitiya nasquinikoy lítlán Dios pi camapácsalh.  
15 Chu pi xlipacs xlítlihuaka xtacanajlacán  
nasquinikoy Dios camapácsalh, yama tatalá  
xlicaná napacsa, chu lapi huá xlipatímá caj  
xpápacata xtalákalhín huántu xtlahuanit,  
xlicaná pi Dios pacs namatzankánaniy. 16 Huá  
xpápacata ccalihuaniyán pi calákalhapalanítit  
mintalákalhíncán chátunu amakapitzín, chu  
calapalacatlahuátit oración c-xlacatín Dios  
laquimpi mäsqui tú xlitatatlayátit napacsátit.  
Sampi yama chixcú huánti tlán xtapuhuán,  
chu xlipacs xnacú lítluahuay oración, xlicaná  
pi xoración kalhiy tlanca lítlihuaka, chu Dios  
kaxmatniy huántu squiniy. 17 Xahuá caj  
calacapastáctit xamakan quilhtamacú yama  
profeta Elías, na caj catihuá chixcu xuanit  
xtachuná lantla quin, huampi acxní xlipacs  
xnacú tzúculh squiniy Dios c-xoración pi niálh  
camilh sen, pus aktutu cäta áítat ni milh sen.  
18 Acxní squinipá Dios pi camacamilhá sen, Dios  
kaxmátnih xoración, chu macámilh sen, chuná  
chu námá tilanáñampá cätiyatna.

19 Natalanín, pala tí akstítumá xlipahuán  
Quimpuchinacán, huampi xamaktum milh  
quilhtamacú tlahuay talákalhín, chu akxtak-  
makán huántu aya xlipahuán, chu lapi chátum  
litum huánti na lipahuán Cristo namaktayay  
pi calipahuampá Quimpuchinacán, 20 luhua  
milicatzitcán pi huánti yumá maktayay chátum  
xtacanajlaní huánti xmalaktzankáma xlatámat  
xpápacata xtalákalhín, lapi mäakataksnij pi  
calipahuampá Dios, chu calakmákalh xtalákalhín,

pus luhua tlanca litlán tlahuaniy lantla  
lakmáxtuniy xlistacná laquimpi ní xlipáán  
naníy, chü Dios mātzankananiy yamaxlilhuhua  
xtalakalhín huantu xtlahuanit.

**Hua xasasti talaccaxlan quinTlatican  
Jesucristo  
New Testament in Totonac, Highland (MX:tos:Totonac,  
Highland)**

copyright © 2009 Wycliffe Bible Translators, Inc.

Language: Totonac, Highland

Translation by: Wycliffe Bible Translators, Inc.

Totonac, Highland

tos

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Totonac, Highland

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
df936465-4138-5f59-b29c-cb397c2f3526